



ԱՇԽԱՏՈՒԹՅՈՒՆՆԵՐ

ՀԱՅԱՍՏԱՆԻ
ՊԱՏՄՈՒԹՅԱՆ
ԹԱՆԳԱՐԱՆԻ

2(10)

ՀԱՅԱՍՏԱՆԻ ՊԱՏՄՈՒԹՅԱՆ ԹԱՆԳԱՐԱՆ

ԱՇԽԱՏՈՒԹՅՈՒՆՆԵՐ
ՀԱՅԱՍՏԱՆԻ ՊԱՏՄՈՒԹՅԱՆ ԹԱՆԳԱՐԱՆԻ
№ 2(10)

ԵՐԵՎԱՆ 2022

*Տպագրվում է Հայաստանի պատմության թանգարանի
գիտական խորհրդի որոշմամբ*

Հրատարակվում է 1948 թվականից

Խմբագրական խորհուրդ՝

Նժդեհ Երանյան, պ. գ. թ. – նախագահ

Հայկ Նազարյան, պ. գ. թ. – պատրաստանապես քարտուղար

Պավել Ավետիսյան, պ. գ. դ., ՀՀ ԳԱԱ թղթակից անդամ

Հարություն Մարության, պ. գ. դ.

Համլետ Պետրոսյան, պ. գ. դ., պրոֆեսոր

Հռիփսիմե Պիկիցյան, պ. գ. թ., դոցենտ

Ռուբեն Վարդանյան, պ. գ. թ.

Մխիթար Գաբրիելյան, պ. գ. թ., դոցենտ

Արսեն Բոբոխյան, պ. գ. թ.

Տորք Դալայյան, ք. գ. թ.

Համո Սուքիասյան, պ. գ. թ., դոցենտ

Արա Սանճեան, PhD (ԱՄՆ)

Ռոբերտո Դան, PhD (Իտալիա)

Հրաչ Չիլինկիրեան, PhD (Մեծ Բրիտանիա)

ԲՈՎԱՆԴԱԿՈՒԹՅՈՒՆ

ՅՆԱԳԻՏՈՒԹՅՈՒՆ

Արման Նայրանդյան

ՇԻՎԱՀՈՂԻ Ս. ՍՏԵՓԱՆՈՍ ՆԱԽԱՎԿԱ ԵԿԵՂԵՑՈՒ
ՊԵՂՈՒՄՆԵՐԻ ԱՐԴՅՈՒՆՔՆԵՐԸ 8

Կարեն Թոխարյան

ՄԵԾ ՀԱՅՔԻ ԱՐՑԱԽ ԵՎ ՍՅՈՒՆԻՔ ԱՇԽԱՐՀՆԵՐԻ
ԺԱՅՈՒՊԱՏԿԵՐՆԵՐԸ 18

Նժդեհ Երանյան, Համլիար Պեղրոսյան

ՏՈՂԻ ՍՐ. ՀՈՎՀԱՆՆԵՍ ԵԿԵՂԵՑՈՒ ՀՆԱԳԻՏԱԿԱՆ
ՀԵՏԱԶՈՏՈՒԹՅԱՆ ՀԻՄՆԱԿԱՆ ԱՐԴՅՈՒՆՔՆԵՐԸ 31

Варданесова Татьяна

КОЛЛЕКЦИЯ СРЕДНЕВЕКОВОГО СТЕКЛА
ИЗ РАСКОПОК Г. ТИГРАНАКЕРТ В АРЦАХЕ 41

ՊԱՏՄՈՒԹՅՈՒՆ ԵՎ ԱՐՔՈՒՐԱԳԻՏՈՒԹՅՈՒՆ

Գոռ Ղազարյան

ԳԱՐԵԳԻՆ ՆԺԴԵՀԸ ԵՎ ԱՐՑԱԽԻ ԳՈՅԱՊԱՅՔԱՐԸ 1920 – 1921 ԹԹ. 46

Մայա Գրիգորյան

ՀԱՅ ՏՊԱԳՐՈՒԹՅԱՆ ԶԱՐԳԱՅՄԱՆ ԸՆԹԱՅՔԸ ՍՅՈՒՆԻՔՈՒՄ
20-ՐԴ ԴԱՐԻ ԱՌԱՋԻՆ ԿԵՍԻՆ 58

Միրանուշ Առաքելյան

ԱՐՑԱԽԻ ԵՎ ՍՅՈՒՆԻՔԻ ԱՎԱՆԴԱԶՐՈՒՅՑՆԵՐԸ
«СБОРНИК МАТЕРИАЛОВ ДЛЯ ОПИСАНИЯ МЕСТНОСТЕЙ И ПЛЕМЕН
КАВКАЗА» (СМОМПК 1881-1915) ՌՈՒՍԱԼԵԶՈՒ ՄԱՏԵՆԱՇԱՐԻ ԷԶԵՐՈՒՄ 68

Վանիկ Վիրաբյան

ԼԵՆՆԱՅԻՆ ՂԱՐԱԲԱՂԻ ՀԻՄՆԱԽՆԴԻՐԸ ԹԻՖԼԻՍՈՒՄ 1920 Թ.
ԱՊՐԻԼԻՆ ԿԱՅԱՑԱԾ ՎԵՀԱԺՈՂՈՎՈՒՄ ԵՎ ԱՆԴՐԿՈՎԿԱՍՈՒՄ
ԳՈՐԾՈՂ ԵՎՐՈՊԱԿԱՆ ՊԵՏՈՒԹՅՈՒՆՆԵՐԻ ՌԱԶՄԱՔԱՂԱՔԱԿԱՆ
ՆԵՐԿԱՅԱՅՈՒՑՉՈՒԹՅՈՒՆՆԵՐԻ ԴԻՐՔՈՐՈՇՈՒՄԸ 77

Մհեր Քումանյս

ՂՈՒԿԱՍ ՍԵՔԱՍՏԱՑՈՒ «ԴԱՎԻԹ ԲԵԿ ԿԱՄ ՊԱՏՄՈՒԹՅՈՒՆ
ՂԱՓԱՆՅՈՑ»-Ի ՏԵՂԱՆՎԱՆԱԿԱՆ ՀԱՄԱԿԱՐԳԸ 93

ԴՐԱՄԱԳԻՏՈՒԹՅՈՒՆ

Վեռա Բոյան

ՍՅՈՒՆԻՔԸ ՈՐՊԵՍ ԱՌԵՎՏՐԱԿԱՆ ԵՎ ՄՇԱԿՈՒԹԱՅԻՆ ԽԱՉՄԵՐՈՒԿ (ԸՍՏ ԴՐԱՄԱԿԱՆ ԳԱՆՁԵՐԻ)

108

ԱԶԳԱԳՐՈՒԹՅՈՒՆ ԵՎ ՊԱՏԿԵՐԱԳՐՈՒԹՅՈՒՆ

Լիլիա Ավանեսյան

ՇՈՒՇԻԻ ՀԱՅԿԱԿԱՆ ԺՈՂՈՎՐԴԱԿԱՆ ՏԱՐԱՋԻ ՆՄՈՒՇՆԵՐ (19-ԲԴ-20-ԲԴ ԴԱՐԻ ՄԿԻՋԲ)

118

Կարինե Բաղդյան

ԱՐՑԱԽԻ ԱՍԵՂՆԱԳՈՐԾԱԿԱՆ ԴՊՐՈՑԻ ՇՈՒՐՁ

129

ՄՇԱԿՈՒԹԱՅԻՆ ՄԱՐԴԱԲԱՆՈՒԹՅՈՒՆ

Անուշ Մաֆարյան

ԱՐՑԱԽԻ ԺԱՄԱՆԱԿԱԿԻՑ ԽԱՉՔԱՐԱՅԻՆ ՄՇԱԿՈՒՅԹԸ

138

Նարինե Շամանյան

ՌԱԶՄԱՊԱՐԵՐՆ ԱՐՑԱԽՅԱՆ ՀԵՐՈՍԱՄԱՐՏՈՒՄ (ՊԱՏՄԱՋԳԱԳՐԱԿԱՆ ՈՒՍՈՒՄՆԱՍԻՐՈՒԹՅԱՆ ՓՈՐՁ)

145

Արմինե Շահբազյան

ԴԱՎԻԹ ԲԵԿԻ ԳԼԽԱՎՈՐԱԾ ՍՅՈՒՆԻՔԻ ԱԶԱՏԱԳՐԱԿԱՆ ՊԱՅՔԱՐԻ ՆԵՐԿԱՅԱՑՈՒՄԸ ՀԱՅ ԿԻՆՈԱՐՎԵՍՏՈՒՄ

155

ՀԱՎԱՔԱԾՈՒՆԵՐ ԵՎ ԹԱՆԳԱՐԱՆՆԵՐ

Սևդա Գալստյան

ՀԱՅԱՍՏԱՆԻ ՊԱՏՄՈՒԹՅԱՆ ԹԱՆԳԱՐԱՆՈՒՄ ՊԱՀՎՈՂ ԳԱՐԵԳԻՆ ՆԺԴԵՀԻ ՀԱՎԱՔԱԾՈՒՆ

168

Համլեդր Պեղրոսյան

ԱՐՑԱԽԻ ՏԻԳՐԱՆԱԿԵՐՏԻ ՀՆԱԳԻՏԱԿԱՆ ԹԱՆԳԱՐԱՆԻ ՈՂԻՄԱԿԱՆԸ

183

ՇՈՒՇԻ ՔԱՂԱՔԻ ԹԱՆԳԱՐԱՆՆԵՐԸ

189

ԱՐՄԱՆ ՆԱԼԲԱՆԴՅԱՆ

ՀՀ ԿԳՄՄ նախարարության «Պատրանաշակութային ժառանգության
գիտահետազոտական կենտրոն» ՊՈԱԿ,
ՀՀ ԳԱԱ Հնագիտության և ազգագրության ինստիտուտ
hnagetyan18@gmail.com

ՇԻԿԱՅՈՂԻ Ս. ՍՏԵՓԱՆՈՍ ՆԱԽԱՎԿԱ ԵԿԵՂԵՑՈՒ ՊԵՂՈՒՄՆԵՐԻ ԱՐԴՅՈՒՆՔՆԵՐԸ*

Հիմնաբառեր. Հնագիտություն, գիտական արշավախումբ, պեղումներ, եկեղեցի, հնագիտական գտածո, խեցեղեն, «զանգ»:

Նախաբան

Շիկահողը ՀՀ Սյունիքի մարզի Կապանի ենթատարածքի գյուղերից է, գտնվում է Կապան-Մեղրի մայրուղու 22-րդ կմ-ին, «Շիկահող» պետական արգելոցի մերձակայքում: Շիկահող գյուղը՝ անվան Շիկահողք տարբերակով, առաջին անգամ հիշատակվում է Սյունյաց տան պատմիչ Ստեփանոս Օրբելյանի «Պատմություն նահանգին Սիսական» մեծարժեք աշխատությունում: Այն նշված է Սյունիքի Կովսական գավառի Տաթևի հայրապետական աթոռին հարկատու գյուղերի ցուցակում (Օրբելյան 1861, 377): Հաջորդ կարևոր վկայությունը Ղևոնդ Ալիշանի հաղորդումն է Վերին Շիկահող գյուղի գոյության վերաբերյալ (Ալիշան 1893, 101, 243, 287–288):

Շիկահողը և նրա շրջակայքը հարուստ են հնագիտական և պատմաճարտարապետական հուշարձաններով: Հնագիտական ուսումնասիրությունները ցույց են տալիս, որ գյուղի տարածքում ապրել և ստեղծագործել են դեռևս վաղնջական ժամանակներից: Գյուղում մեծ թիվ են կազմում հնագույն դամբարանները. դրանցից հայտնի են և պետական ցուցակում գրանցված են «Սպիտակ հողեր», «Կապեն արտ», «Թթու ջուր», «Կարմիր հողեր», «Քարաղբյուր» կոչվող վայրերում տարածվող վաղ երկաթի ժամանակաշրջանի դամբարանադաշտերը, իսկ տարածքի հնագույն բնակատեղին կարելի է համարել «Քարկտոր» հնավայրը, որտեղից հայտնաբերված քարե կացինները թվագրվում են մ.թ.ա. II հազարամյակի վերջով (Խնկիկյան 1973, 234): Այնուամենայնիվ գյուղում գերակշռողը միջնադարյան հուշարձաններն են, որոնք սփռված լինելով գյուղի վարչական սահմանների ողջ տարածքում՝ վկայում են, որ այստեղ միջնադարի բոլոր փուլերում գործել է

* Ստացվել է 21. 08. 2022թ., ուղարկվել է գրախոսման 03. 09. 2022թ., ընդունվել է տպագրության 18. 11. 2022թ.:

բավականին խոշոր համայնք: Միջնադարյան բնակավայրերից են «Ղշլաղը», «Գեղցիանդը», «Վերին Գեղցիանդը» և «Աքլորի քարը»: Տեղացիները այն անվանում են «Որցակքար»: Շիկահողը հարուստ է նաև եկեղեցիներով ու միջնադարյան գերեզմանոցներով, ինչպես նաև, անտառի զանազան վայրերում ծվարած «մենավոր» խաչքարերով: Միջնադարյան հուշարձաններից են «Կոնասար» ամրոցը, «Տերտերանց» ջրաղացը, «Ձորի» եկեղեցին («Ծերիգղեցի»)¹: Մի եկեղեցի էլ եղել է «Խրավանդ» կոչվող վայրում, իսկ կամարակապ միաթռիչք կամուրջը տարածաշրջանի 5 նմանատիպ միջնադարյան կամուրջներից մեկն է: Ցավոք, վերոնշյալ հուշարձանների մեծ մասը հիմնականում մեզ հասել են ավերված վիճակում, երբեմն միայն հիմքերն են նշմարվում:

Ս. Ստեփանոս Նախավկա եկեղեցին

Եկեղեցին բարձունքի վրա կառուցված լինելու շնորհիվ իշխող դիրք է գրավում մյուս բոլոր կառույցների նկատմամբ և տեսանելի է գրեթե բոլոր կողմերից: Եկեղեցուց հարավ պահպանվել է փոքր գերեզմանաբակ: Ցավոք, եկեղեցին չունի շինարարական արձանագրություն, որտեղ նշված կլինեք կառուցման թվականը, սակայն ճարտարապետական առանձնահատկությունների հիման վրա կարելի է թվագրել 17-րդ դդ.: Ամբողջությամբ շարված է ճեղքված գետաքարերով և կրաշաղախով: Թաղածածկ սրահի հորինվածքով միանավ կառույց է: Այս տիպը, ճարտարապետական լուծումները և քարատեսակը բնորոշ են ուշմիջնադարյան Սյունիքի եկեղեցական ճարտարապետությանը, երբ այունեցիները, օգտվելով համեմատաբար խաղաղ իրավիճակից, սկսեցին մոխրի միջից վեր հանել հոգևոր կյանքը ու գրեթե բոլոր գյուղերում կառուցվեցին եկեղեցիներ՝ գլխավորապես բազիլիկատի կառույցներ: Պատերն ունեն խոշոր ճեղքվածքներ: Իր ամբողջ երկայնքով ճեղքվածք ունի նաև եկեղեցու թաղը: Այդ երևույթը բնորոշ է նմանատիպ եկեղեցիներին, երբ որմնամույթերով ամուր կանգնած պատերը ծանրությունից ճկվում են դեպի դուրս՝ ճեղքվածք առաջացնելով տանիքին: Միակ մուտքը բացվում է հարավային ճակատի մեջ: Ունի հինգ պատուհան, որոնցից երեքը բացվում են արևելյան ճակատին, մեկը՝ հարավային և մեկը՝ արևմտյան ճակատներին: Պատուհանները նեքուստ անհամեմատ ավելի լայն են, քան արտաքուստ: Եկեղեցին ունի ընդարձակ թաղակապ սրահ, որի թաղը հենված է մեկ զույգ որմնամույթերից սկսվող կամարի վրա: Որմնամույթերը կամարածն թռիչքներով կապված են նաև արևմտյան պատին և ավանդատներին: Խորանի երկու կողմերում փոքր մուտքերով ավանդատներն են: Ավանդատների առաստաղները բավականին ցածր են և չի բացառվում, որ դրանց վերևում լինեն դատարկ տարածություններ, որոնք ճարտարապետական տեսանկյունից կարևոր են ոչ միայն պատերին թեթևություն հաղորդելու առումով, այլև հաճախ օգտագործվել են որպես գաղտնարաններ կամ թաքստոցներ: Պայտածն խորանն ունի 90 սմ բարձրությամբ բեմ, որի վրա տեղադրված է վեմքարը: Խորանի պատին առկա են 5 կամարածն որմնախորշեր: Հյուսիսային պատին է որմնափոր մկրտարանը: Այն նույնպես ունի կամարածն

1 Հուշարձանների անունները վերցված են ՀՀ պետական ցուցակից՝ հաստատված 2002թ.:

վերնամաս: Մկրտարանն ունի քառախորան եկեղեցու հատակագիծ հիշեցնող ավազանափոս: Մկրտարանի դիմաց՝ հարավային պատին, կա ևս մի նմանատիպ որմնախորշ: Եկեղեցու ներսում ողջ հատակը ծածկված էր հողի 5–20 սմ շերտով, սակայն տեղ-տեղ երևում են հատակ հիշեցնող քարեր: Մրահում կատարված աշխատանքների արդյունքում, ի վերջո ամբողջությամբ բացվեց գլաքարե հատակը, որը պահպանվել է գրեթե ամբողջական: Խորանը և ավանդատները նույնպես ունեն այդպիսի հատակ:

Ջարդարանքներ

Հարդարման տեսանկյունից եկեղեցին բավականին աղքատիկ է: Նրա պատերը զարդարում են երկրորդական օգտագործման ենթարկված մի քանի կոթողներ՝ հիմնականում ոչ ճիշտ դիրքերով ագուցված: Հարավային ճակատի արևնույան եզրին, պատի մեջ առկա է խաչաքանդակ անմշակ բազալտ (լայն.՝ 30 սմ, երկ.՝ 110 սմ), որի մակերեսին փորագրված են երկու տարբեր չափերի խաչեր: Նմանատիպ քար (37x107 սմ) կա նաև արևնույան ճակատին: Դրա վրա նույնպես երկու միանման, սակայն չափերով տարբեր խաչեր են:

Հարթաքանդակված քարեր եկեղեցու ներսում չափազանց քիչ են՝ համաժամանակյա այլ եկեղեցիների համեմատ: Առանձնանում են խորանի բեմառեջքին ագուցված երկու նույնատիպ և նույնաչափ խաչքարերը: Դրանցից ճախակողմյանն ունի 60 սմ բարձրություն և 24–26 սմ լայնք: Դրա ավագ խաչի թևերն ավարտվում են գույգ ակնագնդերով: Խաչաթևերի կազմած չորս անկյուններում պատկերված են սեպաձև թևերով պարզ խաչեր: Խաչի տակ քանդակված է խաչաքարձ ձողը: Հորինվածքի վերին և ստորին հատվածներում առկա է արձանագրություն: Մյուս խաչքարի ավագ խաչն իր ձևով կրկնում է նախորդին: Ստորին թևի երկու կողմերում սեպաձև թևերով մեկական պարզ խաչ է պատկերված, իսկ վերին թևի երկու կողմերում վերադիր խաչաքանդակներ են: Խաչքարն ունի 60 սմ բարձրություն և 20–25 սմ լայնություն: Սա նույնպես ունի արձանագրություն: Երկու խաչքարերի արձանագրություններն էլ դժվարընթեռնելի են, սակայն դրանցից մեկի վրա հստակ ընթերցվում է թվագրությունը. «ՌԿԴ» (1615):

Խաչքարի մի բեկոր (28x19) ագուցված է բեմառեջքի վերևում՝ քանդակագարդ երեսը դեպի վեր: Գլխավոր խաչից պահպանված միակ թևը ունի երկճյուղվող եզրեր, պատված է գծագարդերով: Նրա երկու կողմերում պատկերված են հավասարաթև խաչեր:

Գերեզմանակոթողները

Ս. Ստեփանոս Նախավկա եկեղեցու շուրջ ժամանակին գոյություն է ունեցել ընդարձակ գերեզմանոց, որից այսօր, ցավոք, պահպանվել է մի փոքր հատված՝ եկեղեցու հարավային կողմում: Այն, որ թաղումները արվել են ոչ միայն հարավային կողմում, այլ նաև՝ հյուսիսային ու արևելյան կողմերում, փաստվեցին պեղումների ընթացքում բացված թաղումներով, որոնց տապանաքարերը ժամանակի ընթացքում անհետացել են: Պահպանված տապանաքարերից առանձնանում են հետևյալները.

1) Ուղղանկյուն-գուգահեռանիստ տապանաքարը տարածքի ամենից ակնառու հուշակոթողն է՝ ոչ միայն իր աչքի ընկնող սպիտակ գույնի, այլև քարի հղկվածության ու գեղարվեստորեն բարձրարժեք զարդաքանդակների նուրբ մշակման շնորհիվ: Այն նշանավոր Մելիք-Նուրարյանց տոհմի ներկայացուցիչներից մեկի գերեզմանաքարն է: Գտնվում է եկեղեցու հարավային պատից 2 մ հեռավորության վրա: Ունի 124 սմ երկարություն, 64 սմ բարձրություն և 23 սմ լայնություն: Քարի հարավային նիստին քառատող արձանագրությունն է, որն առնված է քարը աջ, վերին ու ձախ կողմերից եզերող զարդագոտու մեջ: Տապանաքարի հյուսիսային նիստին՝ կամարածև փորվածքի կենտրոնում, պատկերված է պարզ խաչ: Արևելյան կողերեսին երեք ուղղահայաց շարքով պատկերված վեցաթև ծաղիկներ են, իսկ արևմտյան կողերեսին բուրվառի պատկեր է: Տապանաքարի գագաթային մակերեսին պատկերված է գավազան՝ գնդածև բռնակով: Արձանագրությունը հետևյալն է.

«ԱՅՍ Է ՏԱՊԱՆ ՇԻԿԱՀՈՂՑԻ Տ[Է]Ր ՄՈՎՍԷՍ
 Ք[Լ]ԱՀ[Լ]ԱՅ[Լ]ԱՅԻ ՄԻՐՈՒՆԱ[Զ]ԱՐԴ՝² ՄԷԼԻՔ ՆՈՒԲԱՐԵԱՆՑԻ 13ԻՆ
 ՕՔ[ՈՍՏ]ՈՍԻ ՎԱԽՃԱՆԻ 18(7 ?)1 ԱՄԻ ԱՅՍ ՏԱՊԱՆԷՔԱՐՆ
 ՇԻՆԵՑԱԻ ՎԱՐԹԱՆ Տ[Է]Ր ՄՈՎՍԷՍԵԱՆ»:

Մովսես քահանայի հիշատակը հավերժացնող այս արձանագրությունը փաստացի գրավոր աղբյուր է ոչ միայն Շիկահող գյուղի մասին, այլև՝ Մելիք-Նուրարյանց նշանավոր տոհմի: Արձանագրության մեջ նշված տարեթիվը պետական ցուցակում ֆիքսված է, որպես 1841, իսկ վկայագրի մեջ՝ 1971 (տապանաքարի վկայագիրը կազմվել է 1996թ)³: Ուշագրավ է, որ նշվում է տապանաքարը պատրաստող վարպետի անունը՝ Վարթան Տեր-Մովսեսեան: Բացառիկ է, որ տապանը արձանագրության մեջ կոչվում է տապանէքար-տապանաքար ձևով:

2) Գտնվում է գերեզմանոցի արևմտյան եզրին: Այն 35x65 սմ չափեր ունեցող, թերմշակ սալ է: Ստորին սրացող մասը խոսում է այն մասին, որ այն ժամանակին կանգնած է եղել ուղղահայաց դիրքով, խրված հողի մեջ: Ուստի այն ավելի շուտ ոչ թե սալատապան է, այլ ուղղաձիգ գերեզմանաքար կամ գլխաքար, ինչպիսիք սովորաբար կանգնեցվում են տապանաքարերի վերնամասում: Սրա հարթեցված մակերեսին կա պատկերված փորագիր պարզ խաչ, որի թևերը եզրերում եռանյուղվում են՝ նմանվելով եռաժանիների:

3) Գտնվում է նախորդի կողքին: Ունի գրեթե ուղղանկյուն կառուցվածք և նման է սալատապանի: Սակայն այն հանգամանքը, որ քարի ստորին կեսը զուրկ է որևէ պատկերից, ստիպում է ենթադրել, որ սա նույնպես ի սկզբանե կանգնած է եղել ուղղահայաց դիրքով՝ կիսով չափ խրված լինելով հողի մեջ: Քարի մակերեսին պատկերված են 6 միանման, հավասարաթև, պարզ խաչեր: Քարն ունի 43x75 սմ չափեր:

4) Տճև եզրերով սալատապան է: Մակերեսի վերին աջ հատվածում խաչ է պատկերված, որի թևերը ավարտվում են գույգ ակնագնդերով: Ստորին թևի եր-

2 Վերծանումը՝ վիմագրագետ Ա. Հարությունյանի:

3 Պատմամշակութային ժառանգության գիտահետազոտական կենտրոնի արխիվ

կու կողմերում աստղեր են, իսկ վերին անկյուններում՝ 5 փոսիկներից կազմված նախշ: Խաչի տակ կա արձանագրություն՝ 5 տող, անընթեռնելի ձեռագրով: Դժվարությամբ կարելի է ընթերցել. «այս է տապան» բառերը և էլի մի քանի տառ: Քարի չափսերն են՝ 55–110 սմ:

5) Նույնպես անձն եզրերով, թերմշակ սալատապան է՝ ստորին հատվածը ունի 30 սմ լայնք, իսկ վերինը՝ 56 սմ, երկարությունը՝ 140 սմ: Քարի հարթ մակերեսին, գրեթե ողջ ծավալով փորագրված է խաչ, որից ներքև շրջան, խաչաբարձ ձող, երկաստիճան պատվանդան: Թևերի եզրերին և կազմած անկյուններին կան կորեր: Աջ խաչաթևի տակ կա հազիվ նշմարվող քառատող արձանագրություն, որից ընթերցվում է առաջին տողը. «ԳԻՐԳՈՐ»:

Եկեղեցու մուտքի երկու կողմերում դրված են խաչքարերի մեկական բեկորներ: Իրանցից մեկը 15–16-րդ դդ. խաչքար է, որի ստորին մասը չկա: Ստորին թևը կտրվածքի պատճառով բացակայում է, մյուս երեք թևերը ավարտվում են երկուական խոշոր ակնագնդերով: Աջ և ձախ թևերից ցած մեկական փոքր պարզ խաչեր են, իսկ վերևում մեծ խաչի կրկնողությամբ փոքր խաչեր: Խաչքարի քիվին կա երկտող արձանագրություն. ԽՏՐԻՇԱՅ: ԱՐԶ ՈՐ: Խաչքարի պահպանված առավելագույն բարձրությունը 48 սմ է, վերին մասի լայնությունը՝ 39 սմ, ստորին մասինը՝ 34 սմ, հաստությունը՝ 10 սմ:

Մյուս քարը, թերմշակ գրանիտ է, կտրված: Այն պարզ գերեզմանաքար է, ինչպիսիք մեծ տարածում են ունեցել ուշ միջնադարում: Պահպանվել են միայն ակոսագիծ պարզ խաչի ստորին թևը և աջ ու ձախ թևերի բոլորակները: Խաչի տակ կա եռատող արձանագրություն՝ հողմահարված և անընթեռնելի: Հստակ կարդացվում են առաջին երկու տառերը. «ես»⁴:

Կատարված աշխատանքները

2012թ. «Երկիր և մշակույթ» կազմակերպությունը (նախագահ՝ Գ. Գևորգյան) հանդես եկավ ծրագրով, ըստ որի նախատեսվում էր վերականգնել Շիկահողի Ս.Ստեփանոս Նախավկա եկեղեցին, բարեկարգել հարակից տարածքը: Նույն տարում ճարտարապետներ Ս. Նալբանդյանի և Ա. Բաղիշյանի կողմից ամբողջությամբ չափագրվեց եկեղեցին, քարտեզագրվեց եկեղեցու շրջակա տարածքը, որից հետո կազմվել է եկեղեցու տեխնիկական վիճակի նկարագիրը և սեյսմիկ եզրակացությունը: Նախաձեռնող կողմի՝ ՀՀ Մշակույթի նախարարության Պատմամշակութային ժառանգության գիտահետազոտական կենտրոնին (այդ ժամանակ տնօրեն՝ Հ. Միմոնյան) ուղղված նամակ-դիմումի հիման վրա կազմվում է արշավախումբ (ղեկավար՝ Ա. Նալբանդյան), ինչով և սկիզբ է դրվում Շիկահողի եկեղեցու ուսումնասիրման աշխատանքների նոր և հանգամանալից փուլին⁵:

Մինչ պեղումներին անցնելը կատարվեցին տարածքի բուսածածկույթից

4 Այս երկու քարերը, ինչպես պարզեցի տեղացիների հետ զրույցներից, այստեղ են տեղափոխվել Խրավանդ կոչվող հնավայրից:

5 Արշավախումբում բացի տեղացիներից կազմված բանվորական ջոկատից, ներգրավվում են նաև Ֆրանսիայից, ԱՄՆ-ից, Կանադայից, Անգլիայից և Ռուսաստանից ժամանած 17 անդամ-կամավորականներ՝ Արեն Բասմաջյանի խմբապետությամբ:

մաքրման և, միաժամանակ, հետազոտման աշխատանքներ, որոնք տվեցին նշանակալի արդյունքներ: Մասնավորապես տանիքում կատարված աշխատանքների ժամանակ հայտնաբերվեցին խաչքարերի բեկորներ: Սև տուֆի մի բեկորի վրա (30x30 սմ) շրջանի մեջ առնված սեպածն թևերով հավասարաթև խաչ է: Խաչապատկեր քար հայտնաբերվեց նաև խորանին: Պեղումներ իրականացվեցին ինչպես եկեղեցու ներսում՝ սրահի, խորանի և երկու ավանդատների տարածքում, այլև եկեղեցու շուրջ, հարավային տապանաբակի տարածքում և այն պատնեշող հենասպատի հիմքերի մոտ:

Գտածոներ

Պեղումների ընթացքում գտնված ամենազանգվածային նյութը, իհարկե, խեցեղենն էր, որը կարելի է բաժանել երկու մեծ խմբի՝ շինարարական և կենցաղային:

Շինարարական խեցեղենը արտահայտվում էր մեծ մասամբ կիսավողրակածն կղմինդրների, և խիստ սակավ՝ հարթ կղմինդրների տեսքով: Տանիքից հայտնաբերվեցին կիսավողրակածն տիպի կարմրավուն մակերեսով հազարավոր կղմինդրներ՝ մեծ մասամբ բեկորային վիճակում: Քիչ չէին նաև ամբողջական կամ թերի պահպանված կղմինդրները: Դրանք ունեն 40 սմ երկարություն և մեծ մասամբ 12–16 սմ լայնություն, սակայն կան նաև 17–18 սմ լայնություն ունեցողները: Լայն եզրերում պատերը հաստ են՝ 2.5 սմ, իսկ նեղ եզրերում պատերի հաստությունը 1 սմ է: Յուրաքանչյուր կղմինդր եզրում ունի աննշան ներճկվածություն՝ կղմինդրաշարի հաջորդող կղմինդրին ամրանալու համար: Լայն եզրում դրանք ունեն մատնեքված երկար գծեր: Բացի կղմինդրից տանիքում գտնվեց 13.2 սմ երկարությամբ և լայն գլխիկով երկաթե խոշոր գամ, ինչպիսիք օգտագործվել են կղմինդրե ծածկը ամրացնելու նպատակով:

Մեծ թիվ են կազմում տնտեսական խեցանոթների տարբեր տիպերի բեկորները, որոնց մեջ առկա են նաև սակավաթիվ 14–15-րդ դդ. ջնարակված բեկորներ: Բեկորների մի մասը կրում է պարզ զարդանախշեր, որոնք կարելի է առանձնացնել երկու խմբի. ա/ վերադիր զարդագոտի, որն իր հերթին պատված է փոսիկների կամ գծիկների շարքերով, բ/ սանրատամ գործիքով արված ալիքածն կամ ուղիղ (կամ երկուսը միասին) նախշազարդեր: Ուշագրավ է նրբիրան, բարակ պատերով անոթի բեկորը, որն իր մակերեսին ունի կոճականման, շրջանաձև ելուստ: Գտնված կանթերը հիմնականում միջնադարին բնորոշ աղեղնաձև տիպի կանթեր են: Դրանց մեջ առանձնանում է ուղղաձիգ կառուցվածքով և դեպի դուրս լայնացող կանթը (երկարությունը՝ 9 սմ): Գտնվեց նաև շրջանաձև կտրվածքով, կորացող կառուցվածքով բռնակ: Այն, կարելի է ենթադրել ունեցել է հորիզոնական դիրք կամ եղել է խփի բռնակ: Երկարությունը՝ 9.3 սմ: Միջնադարյան այս կանթերին զուգահեռ հայտնաբերվեցին նաև մի քանի վաղբրոնզեդարյան գնդաձև կանթեր (Բադալյան 2015, 69–71, 85, 153–159): Դրանցից մեկը խոշոր տարայի պատկանող, մոխրագույն մակերեսով, լավ պահպանված կանթ է: Ունի 5.5 սմ բարձրություն և 2.8 սմ լայնություն: Երկրորդը շազանակագույն է, կտրված և պատված այրվածքի հետքերով: Ունի 5.5 սմ բարձրություն և 2.7 սմ լայնություն: Երրորդ սմու-

շի մակերեսը կրեմագույն է, կոկափայլ, աստառը՝ գորշ, բարձրորակ թրծումով: Բեկորի չափսերն են 7x6 սմ, կանթի բարձրությունը՝ 4.5 սմ, լայնությունը՝ 2.5 սմ: Կուր-Արաքսյան մշակույթին բնորոշ կանթերի առկայությունը Շիկահողի եկեղեցու մոտ, 45–60 սմ խորությունում վկայում են, որ եկեղեցին կառուցվել է վաղագույն դամբարանադաշտի տարածքում, և դրանց հայտնվելը ուշմիջնադարյան գերեզմանների մակարդակում կարելի է բացատրել նրանով, որ թաղումները կատարելու ժամանակ շերտերը խաթարվել են և վաղ շերտերի հնագիտական իրերը հայտնվել են վերին շերտերում:

Գտնվեցին սաջի մի քանի բավական փխրուն և քայքայվող բեկորներ, երեք տարբեր կարասների պատկանող բեկորներ: Դրանցից մեկը հաստ պատերով (2.3 սմ) խոշոր կարաս է, որի բեկորներից մեկի վրա կա միջանցիկ գայլիկոնված անցք: Մյուսը համեմատաբար նուրբ պատերով (պատերի հաստությունը 2սմ) լայնաբերան կարասի բեկորներ են: Թրծումը միջին որակի է, ավազախառն, մակերեսը բաց դարչնագույն է, տեղ-տեղ մրի հետքերով, աստառը՝ քայքայված: Երրորդ անոթից պահպանված է միայն մեկ բեկոր: Այն ուղիղ դրված, գագաթը հարթ կտրած շրթի հատված է, պատի հաստությունը՝ 2.5 սմ: Մակերեսը բաց դարչնագույն, թրծումը՝ միջին որակի, ավազախառն, դուրզի հետքերով:

Ջնարակված բեկորները թեև քիչ են, սակայն կան մի քանի ուշագրավ նմուշներ և կարելի է ենթադրել, որ դրանք հիմնականում պատկանել են օղակաձև կարճ նստուկով թասիկների: Դրանցից մեկը հատակի հատված է, որի աստառը ամբողջությամբ պատված է սպիտակ ջնարակով: Աստառի կողմից ունի հորիզոնական և ուղղահայաց իրար հատվող ներճկված գծեր: Եվս մի բեկոր թե՛ իրանի և թե՛ աստառի կողմից պատված է բաց կապույտ ջնարակով: Աստառի կապույտ ֆոնի վրա սևով արված են կոր գծազարդեր:

Բացի կենցաղային նշանակության կավե անոթների բեկորներից գտնվեցին կավե այլ իրեր ևս: Հատկապես աչքի է ընկնում կոկիկ մշակված, անիվանման, գորշադարչնագույն մակերեսով իլիկի գլխիկը, որի եզրերը կոր են, կողերը՝ ուռուցիկ: Ունի 5.2 սմ տրամագիծ, իսկ կենտրոնում գտնվող միջանցիկ անցքի տրամագիծը 0.8 սմ է (Բաղայան 2015, 226–227, 231):

Եկեղեցու սրահում գտնված խեցեղեն իրերից առանձնանում է մուտքից աջ, մոտ 10 սմ խորությունում գտնված կավե ձիթաճրագը: Այն ունի մոտ 3.5 սմ բարձրություն, ուռուցիկ հատակ, կարճ պատեր և դեպի ներս ճկված շուրթ: Շրթի մի հատվածում առկա է ծորակ, որը պատված է մրի և այրված ձեթի հետքերով: Շիկահողի պեղումներից հայտնաբերված այս միակ ճրագը իր գուգահեռներն ունի Հայաստանի մի շարք հուշարձաններում (Միրիջանյան 2019, 108–121): Մասնավորապես՝ նմանատիպ ճրագներ գտնվեցին Մյունիքի վերջին տարիներին պեղված ուշմիջնադարյան հուշարձաններում, ինչպիսիք են՝ Տեղի Ս. Գևորգ, Հին Գորիսի և Սրաշենի Ս. Հռիփսիմե եկեղեցիները:

Կավե իրերից բացի գտնվեցին չափազանց հետաքրքիր այլ իրեր ևս, որոնցից առաջին հերթին պետք է նշել տանիքի հողահեռացման և ուսումնասիրման աշխատանքների ժամանակ հայտնաբերված երկաթե դաշույնը: Այն լավ է պահպանված, երկշերտ է, ծայրը՝ սուր: Մեջտեղով՝ բռնակից մինչև ծայրը առկա է ակո-

սագիծ: Բռնակը նույալես երկաթից է, սակայն պահպանված փայտի մնացորդները վկայում են, որ այն ունեցել է նաև փայտե մակերես: Պահպանվել են գամեր՝ երկու փոքր, որոնցով բռնակն ամրացվել է շեղքին և մեկ մեծ՝ փայտե մակերեսը երկաթին ամրացնելու համար: Դաշույնի ընդհանուր երկարությունը 43 սմ է, իսկ միայն շեղքինը՝ 33 սմ: Այն գոտու մեջ պահվող, 18-րդ դ. քնորոշ սուր է, ինչը մեծ կիրառություն ուներ այդ դարասկզբին ծավալված ազատագրական պայքարի ժամանակ: Մետաղական գտածոներից են նաև օղակաձև գլխիկով և կարճ՝ հավանաբար կոտրված, պոչով երկաթե բանալին (երկ.՝ 4.2 սմ), գամերը և այլն:

Եզակի հայտնագործություն կատարվեց եկեղեցու հարավային ավանդատան պեղումների ժամանակ. այստեղ նախ գտնվեց ազնվացեղ եղջերուի եղջյուրից մոտ 18 սմ երկարությամբ, սակայն կոտրված գործիք, որի մի եզրում հարթ կտրված և հղկված է, իսկ մյուս՝ սուր եզրին նկատելի է օգտագործման հետևանքով առաջացած մաշվածությունը: Նույն ավանդատան արևելյան եզրի մոտ, ընդամենը 6 սմ խորությունից հայտնաբերվեց բրոնզից թասանման առարկա՝ միատող արձանագրությամբ՝ ՈՍԿԱՆԻ ՈՐԴԻ ՂՈՆՃԱՅ (ըստ Աճառյանի այս իգական անունը գործածվել է 15–18-րդ դդ. և ծագել է պարսկերեն «կոկոն» բառից, Աճառյան 1942, 145): Այն եկեղեցական նվագարան է, ինչպիսիք գործածական են եղել հատկապես Նոր Ջուղայում և դրա շրջակայքում: Ջուղայում այն պարզապես կոչում են «Ջանգ» և օգտագործում տնօրինեքների և հարսանիքների ժամանակ: Ինչպես հին լուսանկարներում և գեղանկարներում է երևում այն սովորաբար եղել է թափոթի առջևով գնացող երեխայի ձեռքում և կարելի է ասել, որ դրանք օգտագործվել են ժողովրդին կոչ անելու, հաղորդելու թափոթի ժամանելու լուրը: Այս նվագարաններն ունեցել են նաև ձող, որոնք կարճ պարանի միջոցով ամրացել են նվագարանի կենտրոնի անցքին ու նվագարանին հարվածելիս զրնգուն ձայն արձակել⁶: Մեր գտած նմուշն ունի ճեղք, բերանի բացվածքը՝ 9 սմ, 4 սմ բարձրություն:

ՕԳՏԱԳՈՐԾԿԱԾ ՍԿԶԲԱՂԲՅՈՒՐՆԵՐ ԵՎ ԳՐԱԿԱՆՈՒԹՅՈՒՆ

ՕՐԲԵԼԵԱՆ 1861–Ստեփաննոս եպիսկոպոս Սիւնեաց, Պատմութիւն տանն Սիսական, Մոսկվա, 1861:
 ԱՃԱՌԵԱՆ 1946–Աճառեան Հ., Հայոց անձնանունների բառարան, Հ.3, Երևան, 1946:
 ԱԼԻՇԱՆ 1893–Ալիշան Ղ, Սիսական, Վենետիկ, 1893:
 ԲԱԴԱԼՅԱՆ 2015–Բադալյան Ռ., Շենգավիթ, Կատալոգ, Հայաստանի պատմության թանգարան, Երևան, 2015:
 ԻՆԿԻԿՅԱՆ 1973–Իսնկիկյան Օ. Հետախուզական պեղումներ Ղափանի շրջանում (1970–1971), «Պատմաբանասիրական հանդես», Երևան, 1973, N 3, էջ 234–240:
 ՄԻՐԻՋԱՆՅԱՆ 2019–Միրիջանյան Դ., Նալբանդյան Ա., Լուսավորության միջոցները թաղման ծեսում, «Բանբեր Հայագիտության», Երևան, 2019, N 3, էջ 108–121:

6 Մեր խորին շնորհակալությունն ենք հայտնում երաժշտագետ Ռուբեն Կնիասեանին և Արմեն Տեր-Կիրեղեանին արժեքավոր տեղեկությունների և լուսանկարների տրամադրման համար:

Arman Nalbandyan

*"Historical and Cultural Heritage Research Center" SNCO
of Ministry of Education, Science, Culture and Sports of RA,
Institute of Archaeology and Ethnography of NAS RA
hnagetyan18@gmail.com*

THE EXCAVATIONS RESULTS OF THE CHURCH OF ST. STEPANOS OF SHIKAHOGH

Keywords: Archaeology, scientific expedition, excavations, church, artifacts, pottery, "bell".

Shikahogh is a village in the Syunik region of RA, in the subarea of Kapan situated on the 22nd km of the Kapan-Meghri highway. The village and its surrounding area are full of archaeological and historical-architectural monuments. The church of St. Stepanos the Nakhavka (Forefather) and its southern cemetery are the first to excel among those monuments.

Unfortunately, the church doesn't have a construction record where the construction date would have been mentioned but taking into account its architectural features the church can be dated back to the 17th century the earliest.

In 2012 the organization "Land and culture" (president G. Gevonyan) came up with a program according to which it was planned to reconstruct the church of St. Stepanos the Nakhavka of Shikahogh and to improve its surrounding territories. In the same year the church was fully measured, the surrounding area was mapped by architects S. Nalbandyan and A. Badishyan after which a description of the technical condition and seismic conclusion were drawn. Based on the letter-application of the initiative side addressed to "Historical and cultural heritage research center" (director H. Simonyan) an expedition was formed (head of expedition A. Nalbandyan) which gave a start to a new and thorough phase in the research process of the church of Shikahogh.

The excavations were carried out in 2013 and the church's base and the floor were found in 1 month. The medieval cultural layer was studied and a lot of discoveries were made. The list of artifacts covered a wide layer of medieval culture: gravestones, glazed and non-glazed pottery, construction pottery, metallic objects, etc. Especially noteworthy are the clay lampshade, the head of a bobbin, the iron dragger and the church bronze musical instrument-"bell".

The excavations became the basis for the reconstruction of the church which was carried out by the initiative of the organization "Land and culture" in 2014–2016.

Арман Налбандян

*"Научно-исследовательский центр историко-культурного наследия" ГНО при Министерстве
образования, науки, культуры и спорта РА,
Институт археологии и этнографии НАН РА
hnagetyan18@gmail.com*

РЕЗУЛЬТАТЫ РАСКОПОК ЦЕРКВИ СВ. СТЕПАНОСА НАХАВКА (СВ. СТЕПАНОСА ПЕРВОМУЧЕНИКА) В ШИКАОХЕ

Ключевые слова: Археология, научная экспедиция, раскопки, церковь, находки, керамика, «колокол».

Шикаох-одно из сел Капанского района Сюникского марза РА, расположенное на 22-м км автодороги Капан-Мегри. Деревня и ее окрестности богаты археологическими и историко-архитектурными памятниками, среди которых в первую очередь

выделяются церковь Св.Степаноса Нахавка (Св.Степаноса Первомученика) и кладбище на ее южной стороне.

К сожалению, Церковная летопись отсутствует, в которой бы указывалась дата постройки, но по архитектурным особенностям ее можно датировать не ранее XVII века.

В 2012 году Организация "Еркир ев мшакуйт" («Страна и культура») (председатель Гевонян Г.) разработала план, восстановления церкви Св.Степаноса Нахавка (Св.Степаноса Первомученика) в Шикаох и благоустройству прилегающей территории. В том же году архитекторы С.Налбандян и А.Бадишян провели полный обмер церкви, картографию территории вокруг неё, после чего были составлены описания технического состояния церкви и сейсмическое заключение.

На основании письма-заявки, адресованной в Научно-исследовательский центр историко-культурного наследия Министерства культуры РА (в то время директор А.Симонян), создаётся экспедиция (руководитель А.Налбандян) для проведения ознакомительных раскопок, которые поспособствовали началу нового и основательного этапа изучения церкви в Шикаох.

Раскопки проводились в 2013 году, и через месяц работы были обнаружены фундамент и пол церкви. Был изучен средневековый культурный слой, сделаны много открытий. Находки включали широкий спектр средневековой культуры: надгробные памятники, неглазурованную и глазурованную керамику, строительную посуду, изделия из металла и многое другое. Особого внимания заслуживают глиняный светильник, пряслице, железный кинжал и бронзовый церковный музыкальный инструмент с надписью.


Раскопки послужили основанием для реставрации и восстановления церкви Св.Степаноса Нахавка (Св.Степаноса Первомученика), по инициативе организации "Еркир ев мшакуйт" и проводились они в 2014–2016 годах.

Արման Նալբանդյան

Շիկահողի Ս. Ստեփանոս Նախավկա եկեղեցու պեղումների արդյունքները



Նկ. 1. Ս. Ստեփանոս Նախավկա եկեղեցու ընդհանուր տեսքը (Լուսանկարի հեղինակ Ս. Նալբանդյան)




Նկ. 2. Եկեղեցու հարակազիծը (Ս. Նալբանդյան, Ա. Բաղիշյան)
Գծանկարի հեղինակ՝ Ս. Նալբանդյան, Ա. Բաղիշյան



Նկ. 3. Բենուտէջին ագուցված զոյգ խաչքարերը (Լուսանկարի հեղինակ՝ Ս. Նալբանդյան)



Նկ. 4. Մելիք - Նուբարյանցի տապանաքարը (Լուսանկարի հեղինակ՝ Ս. Նալբանդյան)



Աղ. 1. Պեղումներից հայտնաբերված արձանագիր «Զանգը», լավ պահպանված մեկ այլ նմուշ և դրա կիրառության արտացոլումը լուսանկարի և գեղանկարի միջոցով: (Եկարները տրամադրել է Ա. Տեր-Վյուրեղյանը)

Աղ. 1. Պեղումներից հայտնաբերված արձանագիր «Զանգը», լավ պահպանված մեկ այլ նմուշ և դրա կիրառության արտացոլումը լուսանկարի և գեղանկարի միջոցով: (Եկարները տրամադրել է Ա. Տեր-Վյուրեղյանը)